

Ishi, Mwenye Dhambi, Ishi!

Mwimbieni Bwana zaburi, Enyi watawua wake. Na kufanya shukrani. Kwa kumbukumbu la utakatifu wake—Zaburi 30:4.

Ili tuwaze na kuongea zaidi juu ya Yesu, na kidogo zaidi juu yetu, tunapaswa kuwa na uwepo Wake zaidi na zaidi. Tukikaa ndani Yake, tutajawa sana na amani, imani na ujasiri na tutakuwa na uzoefu wa ushindi wa kusimulia tunapokuja mkutanoni, kiasi kwamba wengine wataburudishwa na ushuhuda wetu wa wazi na wa thabiti juu ya Mungu. Makubaliano haya ya thamani ya kuadhimisha utukufu wa neema Yake, yanapoungwa mkono na maisha kama ya Kristo, yanakuwa na nguvu isiyozuilika, ambayo inafanya kazi kwa wokovu wa roho.

Upande wa furaha na uchangamfu wa dini utadhihirishwa na wote ambao wanawekwa wakfu kwa Mungu kila siku. Hatupaswi kumvunjia heshima Bwana wetu kwa kueleza kwa majonzi majaribu yanayoonekana kutuhuzunisha. Majaribio yote yanayopokelewa katika namna ya kutufundisha yatazalisha furaha. Maisha kamili ya kidini yatakuwa ya kutia moyo, kuinua, kuadilisha, yakijawa na maneno na kazi nzuri. Adui anafurahia sana kuona roho zilizovunjika moyo, zenye huzuni, anatamani wasioamini wapate mtazamo usiofaa kuhusu matokeo ya imani yetu. Lakini Mungu anatamani dhamiri ifikie kiwango cha juu. Anatamani kuwa ili kila nafsi ipate ushindi katika uweza wa Mkombozi utunzao....

Katika baraka za thamani ambazo Baba yetu wa mbinguni ametupatia, tunaweza kutambua ushahidi usiopimika wa upendo wa milele na huruma kuu ipitayo huruma ya mama kwa mtoto wake mtukutu. Tunapojifunza tabia ya Mungu katika nuru ya msalaba, tunaona rehema, huruma na msamaha uliochanganyika na usawa na haki. Katika lugha ya Yohana tunatamka, "Tazameni, ni pendo la namna gani alilotupa Baba, kwamba tuitwe wana wa Mungu." Tunaona katikati ya kiti cha enzi Mmoja abebaye mikononi, miguuni na ubavuni alama za mateso aliyoyastahimili ili kumpatanisha mwanadamu kwa Mungu na Mungu kwa mwanadamu. Rehema isiyo kifani inatufunulia Baba, asiye na ukomo, Aishiye katika nuru isiyoingilika, lakini Anayetupokea Kwake mwenyewe kupitia kwa ustahilifu wa Mwanawe. Wingu la kisasi lililoweka utisho tu wa taabu na kukatisha tamaa katika nuru iliyoakisiwa kutoka msalabani hufunua maandishi ya Mungu: "Ishi, mwenye dhambi, ishi! Enyi nafsi zilizotubu na kuamini, ishini! Mimi nimeshalipa fidia."

Lazima tukusanyike karibu msalabani. Kristo Aliyesulubiwa lazima awe mada ya kutafakari, ya mazungumzo na ya hisia zetu za furaha zaidi. Tunalazimika kuwa na ibada maalum za kusifu kwa kusudi ya kuweka upya katika mawazo yetu kila kitu tunachopokea kutoka kwa Mungu na ya kuonesha shukrani zetu kwa upendo Wake mkuu na utayari wetu wa kuacha kila kitu kwenye mikono ile iliyopigiliwa misumari msalabani kwa ajili yetu.... Inatupasa kujifunza kuzungumza lugha ya Kanani, na kuimba nyimbo za Sayuni (*The Southern Watchman*, Machi 7, 1905).